

**BOSNA I HERCEGOVINA  
FEDERACIJA BOSNE I HERCEGOVINE  
UNSKO-SANSKI KANTON  
GRAD BIHAĆ  
GRADONAČELNIK**

Broj: 10/1-05-2372/18  
Bihać, 18.04.2018.godine

Na osnovu člana 52. Statuta Grada Bihaća („Službeni glasnik Grada Bihaća“ br. 13/15) i člana 183. stav (2) Poslovnika Gradskog vijeća Bihać („Službeni glasnik Grada Bihaća“ br. 3/16), Gradonačelnik u svojstvu predlagača propisa i drugih akata

**ODREĐUJE**

Izvjestioca Sakiba Alijagića, dipl.pravnik, Stručni savjetnik za poduzetništvo u Službi za upravljanje lokalnim razvojem, na sjednici Gradskog vijeća i radnim tijelima po prijedlogu tačke dnevnog reda:

- Nacrt Odluke o radnom vremenu u određenim djelatnostima na području Grada Bihaća

Gradonačelnik  
Šuhret Fazlić

**BOSNA I HERCEGOVINA  
FEDERACIJA BOSNE I HERCEGOVINE  
UNSKO-SANSKI KANTON  
GRAD BIHAĆ  
GRADONAČELNIK**

Broj: 10/1-05- 2372/18  
Bihać, 18.04.2018.godine

GRADSKO VIJEĆE BIHAĆ  
-ovdje-

Na osnovu člana 52. Statuta Grada Bihaća („Službeni glasnik Grada Bihaća“ br. 13/15) i člana 140. Poslovnika Gradskog vijeća Bihać („Službeni glasnik Grada Bihaća“ br. 3/16), Gradonačelnik Gradskom vijeću Bihać dostavlja na razmatranje radi prihvatanja

**ODLUKU**  
o radnom vremenu u određenim djelatnostima  
na području Grada Bihaća

(Nacrt)

**O b r a z l o ž e n j e**

Pravni osnov:

Pravni osnov za donošenje Odluke o radnom vremenu u određenim djelatnostima na području Grada Bihaća sadržan je u članu 24. stav 1. Zakona o unutrašnjoj trgovini („Službene novine F BiH“ broj 40/10 i 79/17), članu 11. stav 2. Zakona o ugostiteljskoj djelatnosti („Službene novine F BiH“ broj 32/09), članu 40. Zakona o obrtu i srodnim djelatnostima („Službene novine F BiH broj 35/09 i 42/11) i članu 35. tačka c) Statuta Grada Bihaća („Sužbeni glasnik Grada Bihaća“ broj 13/15), kojima se propisuje:

- Član 24. stav 1. Zakona o unutrašnjoj trgovini:

„(1) Radno vrijeme i raspored dnevnog i sedmičnog radnog vremena prodajnih objekata, radno vrijeme u dane državnih praznika i neradnih dana u kojima je trgovac dužan poslovati, te radno vrijeme za tržnice, sajmove, izložbe i druge povremene načine obavljanja trgovine utvrđuje nadležni organ.

- Član 11. stav 2. Zakona o ugostiteljskoj djelatnosti:

„Radno vrijeme i raspored dnevnog i sedmičnog radnog vremena u ugostiteljskim objektima, radno vrijeme u dane državnih praznika i neradnih dana u kojima je ugostitelj dužan poslovati utvrđuje nadležni organ.“

- Član 40. Zakona o obrtu i srodnim djelatnostima:

„(1) Raspored minimalnog dnevnog i sedmičnog radnog vremena obrtnika, kao i minimalno radno vrijeme obrtnika u dane državnih praznika i neradnih dana za pojedine obrte utvrđuje se propisom općinskog, odnosno gradskog vijeća.

(2) Općinsko, odnosno gradsko vijeće za pojedine obrte može propisati raspored početka i završetka dnevnog i sedmičnog radnog vremena.“

- Član 35. tačka c) Statuta Grada Bihaća:

„Gradsko vijeće u okviru samoupravnog djelokruga donosi odluke i druge opće akte kojima uređuje pitanja iz samoupravnog djelokruga Grada i daje njihovo tumačenje“.

Razlozi za donošenje:

Od stupanja na snagu do danas postojeća Odluka o radnom vremenu objekata u oblasti trgovine, ugostiteljstva, obrtničkih i srodnih djelatnosti na području Općine Bihać („Službeni glasnik općine Bihać“ broj 8/13, 9/15 i 12/17) ukazala je na postojanje nedostataka i problema u svojoj primjeni, a koja je do sada već dva puta bila mijenjana i dopunjavana. Problemi su se ogledali u učestalom kršenju propisanog radnog vremena od strane pojedinih ugostitelja, te prekomjernoj buci iz tih objekata, što je imalo za posljedicu uznemiravanje građana koji žive u neposrednoj blizini tih objekata. U cilju iznalaženja rješenja za otklanjanje uočenih nedostataka i kvalitetnijeg rješavanja problematike u okvirima navedene Odluke, trebalo je pristupiti izmjenama iste odnosno donošenju nove Odluke.

Naime, u odnosu na postojeću, novine koje su uvedene u novoj Odluci ogledaju se u slijedećem:

- U prodavnicama u kojima se vrši promet na malo prehrambenim proizvodima određeno je radno vrijeme u zimskom i ljetnom periodu, kao i rad u vrijeme državnih i drugih praznika koji su utvrđeni kao neradni od strane nadležnog organa (prvi dan neradni);

- Propisano radno vrijeme u objektima u kojima se obavlja ugostiteljska djelatnost smanjeno je za 1 sat, ali se isto, pod određenim uslovima može produžiti, muzika u ugostiteljskim objektima mora prestati 1 sat prije prestanka radnog vremena, a nakon isteka radnog vremena zabranjeno je zadržavanje lica u objektu osim uposlenika tog objekta;

- Produženo radno vrijeme može se odobriti u ljetnom periodu i poslije 24,00 sata a najduže do 01 sat, i to za dane petak, subota i nedjelja samo uz ispunjenje taksativno određenih kriterija od strane ugostitelja;

- Produženi rad kod ugostiteljskih objekata može se izuzetno odobriti i poslije 01 sat u dane praznika;
- Vlasniku ugostiteljskog objekta i privrednom društvu kojima je rješenjem dozvoljeno produženje radnog vremena, a isti se ne pridržavaju odredaba ove Odluke ili remete javni red i mir, uskratit će se dalje produženje istog na period ne kraći od šest mjeseci;
- Zahtjev za ukidanje produženja radnog vremena može podnijeti nadležna inspekcija, savjet Mjesne zajednice, grupa građana (stanara) i Policijska stanica Bihać;
- Zbog učestale pojave puštanja glasne muzike posle isteka radnog vremena, ukazala se potreba za uvođenjem strožijih kriterija kod produženja radnog vremena, uz ispunjenje tačno određenih uslova;
- Postojećom Odlukom također nije tretirano radno vrijeme pojedinih uslužnih djelatnosti, a što je definisano novom Odlukom;
- Gradonačelnik može za djelatnosti obuhvaćene ovom Odlukom odrediti drugačije radno vrijeme u dane praznika od radnog vremena propisanog Odlukom, ako ocijeni da za to postoji potreba;
- Uvedene su nove i nešto strožije kaznene odredbe za prekršioce odredaba ove Odluke.

Objašnjenje predloženih odredbi:

Ovom Odlukom utvrđuje se radno vrijeme u toku sedmice, te početak i završetak radnog vremena u toku dana u objektima koji se nalaze na području Grada Bihaća, u kojima fizička i pravna lica, u skladu sa zakonom obavljaju uslužnu djelatnost: trgovinu, ugostiteljstvo, turizam i zanatstvo.

Odredbama člana 2. Odluke definisani su izuzeci od primjene ove Odluke.

Odredbama člana 3., 4. i 5. Odluke regulisano je minimalno radno vrijeme objekata u kojima se obavljaju uslužne djelatnosti, trajanje istog, obaveza isticanja obavijesti o radnom vremenu na vidnom mjestu kao i mogućnost dužeg i kraćeg radnog vremena od minimalnog.

Članovima 6. do 12. Odluke regulisano je radno vrijeme trgovinskih objekata u kojima se obavlja trgovina i trgovinske usluge i raspored istog, ovisno o vrsti trgovine odnosno trgovinske usluge, te rad u vrijeme državnih i drugih praznika koji su utvrđeni kao neradni od strane nadležnog organa.

Odredbama člana 13. Odluke regulisano je radno vrijeme ugostiteljskih objekata i trajanje istog u zavisnosti od vrste ugostiteljskog objekta, trajanje muzike i zabrana zadržavanja lica u objektu osim uposlenika, nakon isteka radnog vremena.

Odredbama člana 15. Odluke određeno je da svi ugostiteljski objekti moraju ispunjavati posebne uslove iz Zakona o zaštiti od buke.

Članovima 16. do 19. Odluke regulisana je procedura dobijanja rješenja za produženje radnog vremena u ljetnom periodu, kriteriji za ispunjenje uslova za izdavanje rješenja, vremenski period izdavanja rješenja za produženje radnog vremena, kao i podnosioci zahtjeva za ukidanje produženja radnog vremena u slučaju remećenja javnog reda i mira ili nepridržavanja odredaba ove Odluke.

Odredbama člana 20. Odluke regulisan je postupak izdavanja jednokratnog odobrenja za produženje radnog vremena u slučajevima organizovanja prigodnih svečanosti, na zahtjev

vlasnika ugostiteljskih radnji, propisani uslovi za izdavanje odobrenja, uz prethodnu saglasnost Policijske stanice Bihać.

Odbredbama člana 22. do 24. Odluke regulisano je radno vrijeme za djelatnosti koje se odnose na igre na sreću, internet usluge, ustanove za dnevni boravak djece i zanatske djelatnosti, te raspored istog.

Odbredbama člana 25. i 26. Odluke određeno je da Gradonačelnik može u slučajevima održavanja prigodnih manifestacija od značaja za grad, i u dane praznika a po zahtjevu poslovnih subjekata, privremeno odrediti drugačije radno vrijeme, ako ocijeni da za to postoje opravdani razlozi.

Odbredbama člana 27. Odluke određeno je da nadzor nad provođenjem odredaba ove Odluke vrše nadležne inspekcije, te Prva policijska uprava Bihać, svako iz svoje nadležnosti.

Odbredbama člana 28. i 29. Odluke propisane su novčane kazne za počinioce prekršaja (pravna i fizička lica), čija je visina u granicama dopuštenog minimuma i maksimuma u skladu sa zakonskim propisima.

Finansijska sredstva:

Za realizaciju ove Odluke nisu potrebna dodatna finansijska sredstva u Budžetu Grada Bihaća.

Prijedlog:

Na osnovu prednje izloženog, Gradonačelnik kao Ovlašteni predlagač, Gradskom vijeću Bihać predlaže da nakon obavljenog pretresa u smislu člana 142. Poslovnika Gradskog vijeća Bihać („Službeni glasnik Grada Bihaća“ br. 3/16) donese Zaključak o prihvatanju Nacrta Odluke o radnom vremenu u određenim djelatnostima na području Grada Bihaća i isti uputi u daljnju Poslovníkom određenu proceduru. Ovo iz razloga što se ne radi o obimnoj i složenoj Odluci, ali je ista od posebnog značaja za građane i pravne subjekte, te je potrebno izvršiti šire konsultacije.

PRILOG:

- Nacrt Odluke o radnom vremenu u određenim djelatnostima na području Grada Bihaća
- Odluka o radnom vremenu objekata u oblasti trgovine, ugostiteljstva, obrtničkih i srodnih djelatnosti na području Općine Bihać („Službeni glasnik Općine Bihać br. 8/13, 9/15 i 12/17)

Gradonačelnik  
Šuhret Fazlić

Na osnovu člana 24. stav (1) Zakona o unutrašnjoj trgovini („Službene novine Federacije BiH“ br. 40/10 i 79/17), člana 11. stav (2) Zakona o ugostiteljskoj djelatnosti („Službene novine Federacije BiH“ br. 32/09), člana 40. Zakona o obrtu i srodnim djelatnostima („Službene novine Federacije BiH“ br. 35/09 i 42/11) i člana 35. stav (1) tačka c) Statuta Grada Bihaća („Sužbeni glasnik Grada Bihaća“ br. 13/15), Gradsko vijeće Bihać na \_\_\_\_\_ sjednici održanoj dana \_\_\_\_\_ 2018. godine, donosi

## O D L U K U

o radnom vremenu u određenim djelatnostima  
na području Grada Bihaća

### DIO PRVI - OPĆE ODREDBE

#### Član 1.

Odlukom o radnom vremenu u određenim djelatnostima na području Grada Bihaća (u daljem tekstu: Odluka) utvrđuje se radno vrijeme u toku sedmice, te početak i završetak radnog vremena u toku dana u objektima koji se nalaze na području Grada Bihaća, u kojima fizička i pravna lica, u skladu sa zakonom, obavljaju uslužnu djelatnost: trgovinu, ugostiteljstvo, turizam i zanatstvo (u daljem tekstu: uslužne djelatnosti).

#### Član 2.

Odredbe ove Odluke ne primjenjuju se na:

- a) poslovne jedinice-radnje koje pružaju ugostiteljske usluge uposlenim u preduzećima, organizacijama, udruženjima i ustanovama;
- b) na skladišta/stovarišta u kojima se vrši promet robe na veliko.

#### Član 3.

(1) Minimalno radno vrijeme je vrijeme u kojem objekti u kojima se obavljaju uslužne djelatnosti moraju biti otvoreni radi zadovoljavanja potreba građana u skladu sa zakonom.

(2) Minimalno radno vrijeme traje najmanje 8 sati dnevno, s tim da ne može biti kraće od četiri (4) sata prije podne i četiri (4) sata poslije podne, osim ako ovom Odlukom, za pojedine uslužne djelatnosti nije drugačije određeno.

(3) Izuzetno, u dane vikenda, državnih i vjerskih praznika, može se utvrditi i duže i kraće radno vrijeme.

(4) Raspored, početak i završetak radnog vremena se utvrđuje u ovisnosti od toga da li se radi o zimskom ili ljetnom periodu. U ovisnosti od vremenskog perioda može se uvesti dvokratno radno vrijeme.

#### Član 4.

Obavijest o radnom vremenu mora biti istaknuta na vidnom mjestu na ulazu u radne prostorije, a lica koja obavljaju uslužne djelatnosti dužna su da se pridržavaju istaknutog radnog vremena, utvrđenog u skladu sa ovom Odlukom.

#### Član 5.

Radno vrijeme u poslovnim prostorima može biti i duže od minimalnog radnog vremena utvrđenog ovom Odlukom i to na način kako utvrde subjekti poslovnih prostora, uz prethodno pribavljeno odobrenje nadležne gradske Službe (u daljem tekstu: Služba).

### DIO DRUGI-RADNO VRIJEME U OBLASTI USLUŽNIH DJELATNOSTI

#### POGLAVLJE I. Radno vrijeme prodavnica na malo

#### Član 6.

(1) U prodavnicama u kojima se vrši promet na malo prehrambenim proizvodima može se odrediti radno vrijeme svakim radnim danom od 06,00 do 21,00 sat u zimskom periodu (od 01.10. do 31.03.), odnosno od 06,00 do 22,00 sata u ljetnom periodu (od 01.04. do 30.09.).

(2) Izuzetno od odredbe prethodnog stava u prodavnicama koje ne mogu obezbijediti neprekidno radno vrijeme, mogu raditi jednokratno ili dvokratno, a u skladu sa članom 3. stav (2) ove Odluke.

(3) Odredbe iz stava (1) ovog člana ne odnose se na prodajni dio pekara koje u svom sastavu osim proizvodnog imaju i prodajni dio.

#### Član 7.

Prodavnice tipa dragstor moraju biti otvorene neprekidno od 00 do 24 sata.

#### Član 8.

(1) U prodavnicama u kojima se vrši promet na malo neprehrambenim proizvodima može se obezbijediti radno vrijeme svakim radnim danom od 08,00 do 19,00 sati.

(2) Izuzetno od odredbe prethodnog stava u prodavnicama koje ne mogu obezbijediti neprekidno radno vrijeme, mogu raditi dvokratno, a u skladu sa članom 3. stav (2) ove Odluke.

#### Član 9.

Radno vrijeme tržnica na malo, odnosno pijaca, određuje se pijačnim redom koji donosi trgovac koji pruža usluge tržnice na malo, odnosno pijace, i na koji saglasnost daje nadležni organ lokalne samouprave.

#### Član 10.

U vrijeme državnih i drugih praznika koji su utvrđeni kao neradni od strane nadležnog organa samo je prvi dan neradni, a za ostale dane radno vrijeme je kao u članu 6, 7. i 8. Odluke.

#### Član 11.

(1) Minimalno radno vrijeme u apotekama je 8 sati dnevno, a subotom 5 sati, stim što se rad može odvijati i dvokratno u skladu sa članom 3. stav (2) ove Odluke.

(2) Apoteke mogu raditi i duže od minimalnog radnog vremena, kao i uvesti dežurstvo nedeljom, ukoliko ispunjavaju zakonom predviđene uvjete.

#### Član 12.

Radno vrijeme benzinskih pumpi, te ugostiteljskih i trgovinskih objekata koji rade u sastavu benzinskih pumpi može trajati u vremenu od 00 do 24 sata.

### POGLAVLJE II. Radno vrijeme ugostiteljskih objekata i igara na sreću

#### Član 13.

(1) U objektima u kojima se obavlja ugostiteljska djelatnost određuje se radno vrijeme svakim danom od 06,00 do 23,00 sata u zimskom računanju vremena, odnosno od 06,00 do 24,00 sata u ljetnom računanju vremena.

(2) Ugostiteljski objekti koji imaju uslove za rad noću, u zatvorenim prostorima: noćni bar, noćni klub i disco klub (disco bar), rade od 21 do 03 sata.

(3) Muzika u ugostiteljskim objektima mora prestati 1 sat prije prestanka radnog vremena.



(4) Nakon isteka radnog vremena zabranjeno je zadržavanje lica u objektu osim uposlenika tog objekta.

(5) Izuzetno od navedenog vremena iz stava (1) ovog člana, može se produžiti navedeno radno vrijeme rješenjem nadležne Službe.

#### Član 14.

Hoteli, moteli, pansioni, prenoćišta i drugi objekti koji pružaju usluge smještaja i to odjel recepcije, mogu svoje radno vrijeme organizovati non stop tj. od 00 do 24 sata.

#### Član 15.

Svi ugostiteljski objekti moraju ispunjavati posebne uslove iz Zakona o zaštiti od buke.

#### Član 16.

Ugostiteljski objekti mogu u ljetnom periodu, tj. od 01.04. do 30.09. produžiti radno vrijeme iznad maksimalno utvrđenog radnog vremena samo po dobijenom rješenju za produženje radnog vremena od strane nadležne Službe.

#### Član 17.

Rješenje za produženje radnog vremena iz člana 16. ove Odluke Služba donosi na zahtjev ugostitelja, a po ispunjenju sljedećih kriterija od strane ugostitelja:

- a) prethodno pribavljeno pismeno mišljenje izdato od nadležne policijske uprave ili stanice po zahtjevu ugostitelja;
- b) provođenje svih mjera zaštite na radu i zaštite od buke;
- c) dostavljanje potvrde od strane Porezne uprave o izmirenim poreznim obavezama;
- d) dostavljanje potvrda o izmirenim obavezama ugostitelja prema Gradu Bihaću i prema javnim komunalnim preduzećima.

#### Član 18.

(1) Produženi rad može se odobriti ugostiteljskom objektu u ljetnom periodu i poslije 24,00 sata a najduže do 01 sat i to za dane petak, subota i nedelja, najduže na period od 6 mjeseci.

(2) Produženi rad može se izuzetno odobriti i poslije 01 sat u dane praznika.

## Član 19.

(1) Vlasniku ugostiteljskog objekta i privrednom društvu kojima je rješenjem nadležne Službe dozvoljeno produženje radnog vremena, a isti se ne pridržavaju odredaba ove Odluke ili remete javni red i mir, uskratit će se dalje produženje istog na period ne kraći od šest mjeseci.

(2) Zahtjev za ukidanje produženja radnog vremena može podnijeti nadležna inspekcija, savjet Mjesne zajednice, grupa građana (stanara) i Policijska stanica Bihać.

## Član 20.

(1) Ugostiteljski objekti u kojima se organizuju prigodne svečanosti i zabave različitog sadržaja (party, svadbe, rođendani, maturske svečanosti, godišnjice, proslava odbrane diplomskog, postdiplomskog rada i doktorata te određene tradicionalne svečanosti kao što je proslava „Nove godine“, „Dana žena“, „Valentinova“ i sl.), mogu raditi u radnom vremenu od 19,00 sati do 03,00 sati narednog dana, ukoliko su prethodno pribavili rješenje o produženju radnog vremena od nadležne Službe.

(2) Ugostitelj u čijem objektu se organizuje prigodna svečanost obavezan je da zahtjev sa popratnom dokumentacijom i ovjerenim ugovorom sa naručiocem ugostiteljske usluge, dostavi najkasnije 7 dana prije proslave, uz uslov da se u toku rada ugostiteljskog objekta ne remeti javni red i mir.

(3) Nadležna Služba će izdati jednokratno odobrenje za produženje radnog vremena iz stava (1) ovog člana, uz prethodnu saglasnost Policijske stanice Bihać, ako poslovni subjekt ili njegova poslovna jedinica, kao i odgovorno lice poslovnog subjekta, nije pravosnažno kažnjeno zbog remećenja javnog reda i mira i zbog nepoštivanja odredbi ove Odluke, u periodu od tri mjeseca unazad od podnošenja zahtjeva za produženje radnog vremena.

## Član 21.

Ugostiteljski objekti izuzev hotela i motela koji pružaju usluge smještaja mogu uvesti jedan dan kao neradni u sedmici.

## Član 22.

Objekti u kojima se obavljaju djelatnosti koje se odnose na igre na sreću u skladu sa Zakonom o igrama na sreću F BiH, kao i djelatnosti koje se odnose na pružanje internet usluga, a u kojima se ne služe alkoholna pića i ne pušta muzika, mogu svoje radno vrijeme organizovati najkasnije do 23,00 sata, ukoliko ispunjavaju uvjete predviđene zakonima koji regulišu ovu oblast.

### POGLAVLJE III. Radno vrijeme ustanova za dnevni boravak djece i zanatskih djelatnosti

#### Član 23.

Radno vrijeme ustanova za dnevni boravak djece (obdaništa, vrtići, igraonice i slično) uvodi se u trajanju od 06,30 sati do 16,30 sati, svakim radnim danom i prvom subotom u mjesecu.

#### Član 24.

(1) Objekti u kojima se obavljaju zanatske djelatnosti moraju obezbijediti minimalno radno vrijeme u skladu sa članom 3. ove Odluke, a izuzetno mogu raditi i u dvije smjene prema ispunjenju minimalno tehničkih uvjeta potrebnih za rad određenih obrtničkih zanimanja.

(2) Radno vrijeme poslovnih objekata iz stava (1) ovog člana ne odnosi se na proizvodne pogone i radnje koje zbog karaktera procesa proizvodnje moraju poslovati mimo utvrđenih vremenskih intervala, uz obavezu poštivanja javnog reda i mira, isključivo u dijelu proizvodnog procesa.

### POGLAVLJE IV. Izuzetci od propisanog radnog vremena

#### Član 25.

Gradonačelnik može u slučajevima održavanja prigodnih manifestacija od značaja za grad, a po zahtjevu poslovnih subjekata, privremeno odrediti drugačije radno vrijeme poslovnih subjekata obuhvaćenih ovom Odlukom, ako ocijeni da za to postoje opravdani razlozi.

#### Član 26.

Gradonačelnik može za djelatnosti iz člana 1. ove Odluke odrediti drugačije radno vrijeme u dane praznika od radnog vremena propisanog Odlukom, ako ocijeni da za to postoji potreba.

### DIO TREĆI- NADZOR I KAZNENE ODREDBE

#### Član 27.

Nadzor nad provođenjem odredaba ove Odluke će vršiti nadležne inspekcije, te Prva policijska uprava Bihać, svako iz svoje nadležnosti.

## Član 28.

Novčanom kaznom u iznosu od 500,00 KM do 2.000,00 KM kaznit će se za prekršaj pravno lice i vlasnik radnje, ako:

- a) odredi radno vrijeme suprotno odredbama ove Odluke,
- b) na propisan način ne istakne obavijest o radnom vremenu ( član 4. Odluke),
- c) se ne pridržava istaknutog radnog vremena,
- d) koristi muziku suprotno članu 13. ove Odluke,
- e) dozvoljava boravak gostiju nakon isteka radnog vremena.

## Član 29.

Za prekršaje iz člana 28. ove Odluke, kaznit će se i odgovorno lice u pravnom licu novčanom kaznom u iznosu od 300,00 KM do 500,00 KM.

## DIO ČETVRTI- PRIJELAZNE I ZAVRŠNE ODREDBE

## Član 30.

Poslovni subjekti koji posluju u objektima iz člana 1. ove Odluke, dužni su svoje radno vrijeme uskladiti s odredbama ove Odluke u roku od 30 dana od dana njenog stupanja na snagu.

## Član 31.

Postupci koji su pokrenuti prije stupanja na snagu ove Odluke, okončat će se u skladu sa propisima koji su važili do dana stupanja na snagu ove Odluke.

## Član 32.

Stupanjem na snagu ove Odluke prestaje da važi Odluka o radnom vremenu objekata u oblasti trgovine, ugostiteljstva, obrtničkih i srodnih djelatnosti na području Općine Bihać („Službeni glasnik Općine Bihać“ broj 8/13, 9/15 i 12/17).

## Član 33.

Ova Odluka stupa na snagu osmog dana od dana objavljivanja u Službenom glasniku Grada Bihaća.

Broj: \_\_\_\_\_/18  
Bihać, \_\_\_\_\_ 2018. godine

Predsjedavajući Gradskog vijeća  
Davor Župa